

Ս.ԳՐԻԳՈՐ ԼՈՒՍԱԽՈՐԻՉ ՀԱՅԱՍՏԱՆԵԱՅՑ ԵԿԵՂԵՑԻՈՅ

ՏԱՐԵԿԱՆ ԾԽԱԿԱՆ ՀԱՄԱԳՈՒՄԱՐ ԺՈՂՈՎԻ

Սիրելի անդամներ,

Տարեկան ծխական համագումար ժողովին սիրով կ'ողջունեմ Ձեզ, յանուն Հայաստանեայց Առաքելական Ս.Եկեղեցւոյ Հիւսիսային Ամերիկայի Հայոց Արեւելեան Թեմի Բարեջան Առաջնորդ Գերաշնորհ Տ.Թորգոմ Ս.Արքեպիսկոպոս Մանուկեանի, եւ կը մաղթեմ որ Ձեր ժողովական աշխատանքները ըլլան օրինաւոր, Ձեր քննադատութիւնները՝ շինիչ, եւ մանաւանդ չմոռնաք Ձեր գոհունակութիւնը յայտնելու առ Բարձեալն Աստուած, որ տուիչն է ամէն բարեաց, եւ որ պարգեւեր է Ձեզ ազնիւ եւ նուիրեալ հայու հոգիներ, որոնք իր Միաձին Որդւոյն Յիսուս Բրիստոսի Եկեղեցիին պայծառութեան եւ բարեկարգութեան համար կ'աշխատին, արժանի ժառանգորդները հանդիսանալու համար մեր պանծալի նախահայրերուն, որոնք դարեր շարունակ ստեղծագործական վառ տեսիլքներով աղօթեցին եկեղեցւոյ նուիրական կամարներուն տակ, արցունքներով օծեցին անոր համեայ բայց միշտ վերանորոգուող որմերը, առանց սպառելու հաղորդուեցան անոր կենսաբաշխ հացով ու զինիովը, եւ երանելի օր մըն ալ թաղուեցան անոր հովանիին տակ հանդարտութեամբ ու հեզութեամբ:

Ահաւասիկ երեք յաւիտեաններով նուիրագործուած եկեղեցի մը, որ մնացեր է այնքան կանգուն ու անարատ, որքան իր Գլուխն ու Փրկիչն է, եւ որ կը շարունակէ իր առաքելութիւնը սպասաւորութեան ղնել Աստուածային Թագաւորութեան երկրի վրայ հաստատման եւ մարդոց ներդաշնակ համեղբայրութեան:

Այս պահուս Ձեր աչքերուն մէջ գոհունակութեան արտայայտութիւն կը տեսնեմ, Ձեր հինգ երկար տարիներու այրիութիւնը եւ սգաւորութիւնը դարմանուած տեսնելով: Անցնող հինգ տարիներու ընթացքին եկեղեցւոյդ հոգեւոր հովուութիւնը թափուր մնաց, վախճանումովը Ձեր արժանաւոր հոգեւոր հովիւ Տ.Սարգիս Բահանայ Գաշըքճեանի, որ իր քիչ մը աւելի յառաջացած անհանգստութեան պատճառաւ, կանուխ այրիացուց Ձեզ, երթալ միանալու կեանքի միւս ափին իրեն սպասող եկեղեցւոյ նուիրեալ հոգեւոր սպասաւորներուն: Թող Աստուած յաւիտենական հանգիստ պարգեւէ իր վաստակաբեկ ոսկորներուն, եւ Երկնային միթարութիւն՝ իր ընտանիքի իւրաքանչիւր անդամին եւ հարազատներուն, եւ Ձեզի ալ պարգեւէ առաւել շնորհ եւ գիտակցութիւն իր յաւիտենական փառքին համար ընծայուած եւ նուիրագործուած հօտէն նոր հովիւներ յարուցանելու Ս.Եկեղեցւոյ սպասաւորութեան համար:

Աստուածային նախախնամութեան կը պարտիմ մեր կրկին իրար հանդիպումը արդարեւ, ովկիանոսի միւս ափէն կրկին Ձեզի գալու եւ իբրեւ նոր փեսայ կանգնելու Ձեր կողքին, այրիութեան սեւ շղարշը վերցնելով Ձեր գլխուն վրայէն:

Արդ, իբրեւ հաւանական թեկնածու Ձեր հոգեւոր հովուութեան պաշտօնին, Առաջնորդ Ս.Հօր հաւանութեամբ եւ պատուարժան ծխական խորհուրդիդ կարգադրութեամբ, եկած եմ ստանձնելու Ձեր հոգեւոր սպասաւորութիւնը, սպասելով որ պատկառելի ծխական ժողովդ, օրինաւոր ընտրութիւն կայացնելով իր նոր հոգեւոր հովիւին, արդիւնքը տեղեկացնէ Առաջնորդ Ս.Հօր Օրհնութեան եւ վաւերացման համար, որմէ ետք հովիւ եւ հօտ կողք կողքի եւ սիրտ սրտի, պիտի աշխատին Աստուծոյ միայն հաճոյ ըլլալու ոգիով պայծառացնելու մեր Առաքելական, Սուրբ եւ Ընդհանրական Եկեղեցին:

Այս հանդիսաւոր առիթով իմ խորին շնորհակալութիւնս կը յայտնեմ պատուարժան ծխական խորհուրդին եւ անոր արժանաւոր Ատենապետ Տիար ծործ նահապետեանին, ինչպէս նաեւ եկեղեցապատկան մարմիններուդ եւ կազմակերպութիւններու, որոնք առաջին մէկ օրէն շրջապատեցին զիս, եւ դեղեւուն քայլերս առաջնորդեցին այս ընդարձակածաւալ քաղաքին մէջ իմ առաջին ծանօթութիւնս առնելու իբրեւ բնակիչ:

Մասնաւոր շնորհակալութիւնս կը յայտնեմ նաեւ մանաւանդ մեր սիրելի Տօթ. եւ Տիկին Վահէ Քարաչէօրլու ընտանիքին, որոնք ծխական խորհուրդիդ կարգադրութեամբ եւ հարազատի գագցումով դիմաւորեցին զիս, եւ երկու շաբաթ հիւրասիրելով իրենց տան մէջ, իբրեւ իրենց ընտանիքին մէկ անդամը, այսպէս ինծի համար երջանիկ գոհունակութիւնը շնորհեցին իմ հոգեւոր առաքելութիւնս սկսելով հայկական ընտանեկան յարկէ մը: Թող Աստուած շէն ու խանդավառ պահէ իրենց օջախը, եւ իր շնորհերով առատացնէ իրենց երջանիկ գաւակները:

Ահաւասիկ այս է իրական եւ ճշմարիտ միջոցը եկեղեցւոյ մը հոգեւոր անդամակցութեան, երբ անկեղծօրէն եւ ջերմեռանդութեամբ կրնանք ըսել 'Տիրոջ Տունը իմ տունս է' եւ ապրիլ ու գործել անոր հովանիին տակ, այն ստեն ոչ մէկ դժուարութիւն պիտի ունենանք նոյն այդ եկեղեցւոյ հոգեւոր սպասաւորութեան համար նուիրեալ հոգիներ պատրաստելու եւ յարուցանելու, քաջ համոզուած ըլլալով որ, անոնց Ձեռնադրութեան Սուրբ Խորհուրդով շնորհուած սրբութիւնը ճառագայթելով անոնց անձէն եւ գործէն, զիրենք կրկնապէս պիտի հարստացնեն եւ ընտիր անօթներ դարձնեն հոգեւոր սպասաւորութեան: Այսպիսով անոնք, հոգեւոր սպասաւորները երբ կենդանի հոգեւոր հաղորդակցութեամբ կը սկսին ծանչնալ իրենց հօտին իւրաքանչիւր անդամները եւ կենդանի մասերը դառնալ այսպէս իւրաքանչիւր անդամ ընտանիքներուն, այն ստեն մենք պարտինք աւելի գործունեայ եւ նուիրեալ հոգի մը ցոյց տալ մեր հասարակաց Փրկչին, որ մեր Գլուխն է, միշտ հնազանդ մնալով իրեն:

Այ մէկ ժամանակ եկեղեցին պարտքի եւ պարտաւորութիւններու ցանկ մը ունի իր անդամները վարձատրելու ակնկալութեամբ, միշտ հաւատալով որ երկիրն ինքնին բերէ զպտուղն: Մեզի հայրերուս համար եկեղեցին ամէն բանէ առաջ հաւատքի եւ հայրենի նախանձախնդրութեան կենդանի արտայայտութիւնն է, որ կ'արդիւնագործուի հոգիով եւ ճշմարտութեամբ անդամակցած հոգիներու կամաւոր եւ սակայն անսակարկ ծառայութեամբ, աւելի հոգեւոր պարգեւներու հետամուտ ըլլալով: Եկեղեցական համայնքի մը համար կարեւոր չէ որքան սուրբ վճարող անդամներ ունենալը եւ որքան նիւթական շօշափելի հասոյթ ապահովելը, այլ որքանով ան արդարացուցած է իր եկեղեցի կոչումը, ամէն բանէ առաջ սուրբեր պատրաստելու նուիրական առաքելութեան մէջ:

Եթէ ասկէ յիսուն եւ աւելի տարիներ առաջ Ձեր հայրերը կեանքի աւելի դժուարին պարագաներու տակ զրեթէ անկարելին կարելի դարձնելով հոգեւոր եկեղեցի մը կտակեցին Ձեզ, պիտի չպահենք զայն անոր նիւթական մատակարարութիւնը ապահոված ըլլալու համար միայն, այլ պարտինք զայն դարձնել արժանապէս եւ արդար իրաւունքով հայ ազգային արժանապատուութեան կողան մը, յոյսի եւ վստահութեան փարոս մը, եւ բոլոր տեսակի դժուարութիւններու դէմ կողակելու եւ մաքառելու ամուր բերդ մը, որ սակայն ներսէն պաշտպանուած ըլլայ: Քանզի Քրիստոս, Արքայն Երկնից, այսօր պսակեաց զքեզ խաչին հերով կ'երգէ Սուրբ եկեղեցին: Թող այդ խաչը, քրիստոնէին պարծանքի խորհրդանիշը, այրէ, սպառէ մեր պզտիկ կամաւոր գոհողութիւնները, պայծառացնելով եկեղեցին եւ միխթարելով հաւատացեալ հոգիները:

Թող նոր Տարին ըլլայ բոլորիս համար շնորհաբեր տարի մը, որպէսզի ոչ ոք մեզմէ անմասն մնայ Աստուծոյ շնորհքէն որ անձախապէս կը բաշխուի անհատնում մասերով եւ իր իսկութեան մէջ միշտ ալ անապական կը մնայ:

Զգործս ձեռաց մերոց ուղիղ արա ի մեզ Տէր, եւ զգործս ձեռաց մերոց յաջողեա մեզ. Տէր:

Յաջողութիւն այս ժողովին եւ Աստուծային Օրհնութիւն Ձեր բոլորին:

Ողջունիւ սիրոյ

Յունուար 29, 1978
Շիգակո

Աղօթարար
Հայր Թիրայր Կրդ. Կաշճեան